


古書室日鈔



漢書門			
九	八	七	六
四	三	二	一
類	號	函	架
冊	冊	冊	冊

止之十

內閣文庫			
九	八	七	六
四	三	二	一
類	號	冊	架
冊	冊	冊	冊

內閣文庫			
番號	漢	9484	
冊數	2 (2)		
函號	299	125	



吉雲室日鈔卷五

淺草文庫

東吳貝省三輯錄

子曰苟志於仁矣無惡也言志之不可不定也故志
乎道義未有入乎貨利者也志乎貨利未有幸而為
道義者也志乎道義則每進而上志乎貨利則每趨
而下其端甚微其效甚巨

張稷若
蒿菴集

古人讀書作文必先立志須為古人無為今人為通
儒無為俗學此志一定則是非取舍便能自立於流
俗之中一切榮辱得失不足以震撼其精神胸中擴

然無復一事夫然則見之明見之明則守之固守之固則積之厚積之厚則其發之也沛然而有源鬱然而有光以此爲古人爲通儒不難也今士子自幼學以迄白首其志不過拾科第以自豪耳故其所守者章句所習者時文所趨者風氣宜其齷齪寡昧不能得當於有司也幸而得當於古今文章經世之業全未夢見每當一大事遇一疑義則舌橋口呿如墮雲霧顏之推所謂有識旁觀代其入地非使者所望於多士也

孔子歎子產遺愛而惠與義必兩稱之二者不可偏用也專用猛則玉石俱焚一味寬則公私皆廢不猛不寬惟其是而已矣今之寬非惠也縱也今之猛非義也刻也刑之偏頗而類戾獄之放縱而紛亂不可不察矣

仁者不期於弛刑期於刑當其罪昔人謂求其生而不得然後死之則死者與我之心皆無憾夫必死者與我之心兩無憾則其所全活者多矣
典獄者一日之間所斷刑獄咸當其辜無妄羅織無

輕斬艾將夢寐而魂安檢點而心慊是自然之福自我造之不然悞戕民命反之幽獨其自誅也甚於鬼神之誅我也可不慎歟

古者明刑弼教之衰而刑至於不勝用往往斷死於前觸禁於後司刑者又復以私意行之寡人之屬寡營戴盆千金之子避嫌抵璧內設成心則執此規彼概操一切之法外狃故牘則便囊憚更莫開一面之網或矜智巧以爲聰明或持姑息以惠奸宄上則視堂官之趨向而輕重其手下則惑胥吏之浮言而二

三其見甚且分牒便了而不察事情之曲折立判稱捷而不知訟端之原委出入顛倒與吏爲奸飢寒瘵斃沉滯不問犯者旣已服辜必令妄及平民以爲誅求之計罪人不卽流決必令廣攀富戶以爲賄囑之媒囹圄桁楊之間白日暗而無光長夜漫而弗旦豈

不大可歎哉

右田山蘊少司
農古歡堂集

敏練而居之以鎮靜精明而出之以渾厚

修建學宮設立義館所以崇教化也革除鄉保里役差役行頭所以杜煩擾也禁止火耗振肅官方所以

澄吏道也釐正名分嚴懲刁訟所以安善良也

以公正報 國以寬厚與人以明敏決事以慈惠及物

人家富貴兩字暫時之榮寵耳所恃以長子孫者畢竟是耕讀兩字

人心至靈至動不可過勞亦不可過逸惟讀書可以養之

古人有言掃地焚香清福已具其有福者佐以讀書其無福者便生他想旨哉斯言予所深賞

聖賢仙佛皆無不樂之理彼世之終身憂戚忽忽不樂者決然無道氣無意趣之人孔子曰樂在其中顏子不改其樂孟子以不愧不作爲樂論語開首說悅樂中庸言無入而不自得程朱教尋孔顏樂處皆是此意

人能知富之爲累則取之當廉而不必厚積以招怨視之當淡而不必深恃以累心思我既有此財貨彼貧窮者不取我而取誰不怨我而怨誰平心息忿庶不爲外物所累儉於居身而裕於待物薄於取利而

言身日錄卷五
謹於蓋藏此處富之道也

夫年壽既高子息蕃衍焉能保其無疾病痛苦之事
賢愚不齊升沉各異聚散無恒憂樂自別但當教之
孝友教之謙讓教之立品教之讀書教之擇友教之
養身教之儉用教之作家其成敗利鈍父母不必過
爲縈心聚散苦樂父母不必憂念成疾但視己無甚
刻薄後人當無倍出之患己無大偏私後人自無攘
奪之患己無甚貪婪後人自當無蕩盡之患至於天
行之數稟賦之愚有才而不遇無因而致疾延良醫

慎調治延良師謹教訓父母之責盡矣父母之心盡
矣

讀書者不賤守田者不饑積德者不傾擇交者不敗
人生必厚重沉靜而後爲載福之器

人生以擇友爲第一事自就塾以後有室有家漸遠
父母之教初離師保之嚴此時乍得友朋投契締交
其言甘如蘭芷甚至父母兄弟妻子之言皆不聽受
惟朋友之言是信一有匪人廁其間德性未定識見
未純斷未有不爲其所移者

與人相交一言一事皆須有益于人便是善人

古人云凡人欲飲酒博奕一切嬉戲之事必皆覓伴
侶爲之獨讀快意書對佳山水可以獨自怡悅凡聲
色貨利一切嗜欲之事好之有樂則必有苦惟讀書
與對佳山水止有樂而無苦

易經一書言謙道最爲詳備天道虧盈而益謙地道
變盈而流謙鬼神禍盈而福謙人情惡盈而好謙又
曰日中則昃月滿則虧天地不能常盈而況于人乎
況于鬼神乎于此理不啻反覆再三極譬罕喻書曰

滿招損謙受益古昔聖賢殆無異辭堯舜大聖人而
史稱之曰恭儉讓況乎中人之才能越斯義古云終
身讓路不失尺寸言讓之有益無損也

富貴子弟人之當面待之也恒恕而背後責之也恒
深如此則何由知其過失而顯其名譽乎故世家子
弟其謹飭如寒士其儉素如寒士其謙沖小心如寒
士其讀書勤苦如寒士其樂聞規勸如寒士如此則
自視足矣而不知人之稱之者尙不能如寒士必也
謹飭倍于寒士儉素倍于寒士謙沖小心倍于寒士

讀書勤苦倍于寒士樂聞規勸倍于寒士然後人之
視之也僅得與寒士等今人稍稍能謹飭儉素謙下
勤苦人不見稱則曰世道不古世家子弟難做此未
深明于人情物理之故者也

譚子化書訓儉字最詳其言曰天子知儉則天下足
一人知儉則一家足且儉非止節蓄財用而已也儉
于嗜慾則德日修體日固儉于飲食則脾胃寬儉于
衣服則肢體適儉于言語則元氣藏而怨尤寡儉于
思慮則心神安儉于交遊則匪類遠儉于酬酢則歲

月寬而本業修儉于書札則後患寡儉于干請則品
望尊儉于僮僕則防閑省儉于嬉遊則學業進其中
義蘊甚廣大約不外於葆蓄之道

五六年來得一法一身五官百骸聽其與憂喜煩苦
相纏綿獨守靈府方寸之地堅閉四門不許憂喜榮
辱進退升沉勞苦生死得失一切之念稍稍闌入其
中間或踈虞打入片刻卽忙驅逐仍前堅守若此外
之聲音笑貌惟有聽其波委雲屬與憂喜相浮沉而
已更有安心一法非理事決不做費力挽回事決不

做敗壞生平不可告人事決不做衙門中事一切因物付物一事當前只往穩處想應過輒已不將迎於事前不留滯於事後

喧不礙寂者泉聲也艷不傷道者花峪也巧不蕩志者鳥語也樂不招尤者隱居也舉世在明昧之間無人超苦樂之趣

垂釣竿坐籃輿騎跛驢蹋芒屨皆隱者之事然聞達官案頭有釣艇圖不聞山人壁上有待漏圖試取叅之

人生天涯遠別由聲利場中山翁離數步老妻穉子

往送來迎焉知離別之苦此景可畫右張文端公篤素堂集

應對舉止之間其人之智愚敬忽大畧可見至其福

澤之厚薄亦不可不審夫福厚者必得器厚也其為

人也大抵皆堅凝持重謙謹安詳奉上必誠恪也任

事必周密也待人必寬恕也臨財必慎重也其際危

急之時值艱險之地乃能鎮靜而不驚好謀而克濟

也陳天一
叅議語

格物致知要于切已處用力則知乃真知物非外物

意誠心正一以貫之矣

蔣謂公廉訪語

絕苞苴止僭濫清獄訟肅軍伍除稂莠安愿良

申保甲以清盜藪鋤疆禦以甦民困

右韓文懿公語

士君子平居讀書必明於古昔治亂得失之故人才

賢否之辨世運升降之由然後發於文章施於政事

莫不沛然而有餘犁然而不惑

王文簡公漁洋文集

吉雲室日鈔卷五終

吉雲室日鈔卷六

東吳貝省三輯錄

天之與人福澤有如鍾者有如卮者但知愛惜則一

卮之福用之而不盡若恣意狼藉則盈鍾之福一覆

立竭故節慎之人多壽暴殄之人多天理固然也況

乎君子造命自求多福一念戒慎天繼以祿一念放

侈神奪其福此中尤有轉移乎

王伯谷給諫恥躬堂集

學也者學為聖學為賢也講也者講明所以為聖為

賢之理俾知所從事也

願吾黨有志之士以默識爲真修以篤行爲至教勿
口舌軋擊以矜能勿意見紛拏以長傲尊賢容衆嘉
善矜愚偕遊於大道爲公之世而無所爲怙己凌人
之弊

右熊文端公
有愚齋集

洪範六極弱居其一 所貴讀書變化氣質當斷不斷

爾自貽戚

自箴
銘

生者待汝養死者待汝葬天下後世待汝治汝無或
輕爾身以徇無涯之欲而喪厥志

座右
銘

深以古道爲期而勿以流俗自處以學問勵於己以

遇合聽於天以朴實爲寶而以輕佻之習爲可鄙則
將來所售自不可限量

我雖在京深以汝讀書爲念非欲汝讀書取富貴實
欲汝讀書明白聖賢道理免爲流俗之人讀書做人
不是兩件事將所讀之書句句體貼到自己身上來
便是做人的法如此方叫得能讀書人若不將來身
上理會則讀書自讀書做人只算箇不曾讀
書的人

汝讀書要用心又不可性急熟讀精思循序漸進此

言言日錄卷六
八箇字朱子教人讀書法也當謹守之又耍思讀書
耍何用古人教人讀書是欲其將聖賢言語身體力
行非欲其空讀也凡日間一言一動須自省察曰此
合於聖賢之言乎不合於聖賢之言乎苟有不合須
痛自改易如此方是真讀書人這便是學聖賢工夫
汝能如此吾心方歡喜勉之勉之

吾教子之念與他人異功名且當聽之於天但必欲
其爲聖賢路上人望時時鼓舞其志氣使知有向上
一途所讀書不必欲速但要極熟雖尙是記誦之學

然必有此根腳然後可就上面講究聖賢學問未有
不由博而約者
人處境不佳只有和平一法怨尤之氣減得一分有
一分受用也

聖賢之學不貴能知而貴能行須將小學一書逐句
在自己身上省察日間動靜能與此合否少有不合
便須愧恥不可以俗人自待在長安中尤不宜輕易
出門恐外邊習氣不好不覺被其引誘也胸中能浸
灌於聖賢之道則引誘不動矣

我見人家有累世富盛者必其人戰戰兢兢常若履
虎尾涉春冰自卑而尊人也有方盛而忽衰者必其
自尊大視其家若泰山之固磐石之安人無如我何
者也此理甚明但人家子弟生長富厚不能如創業
之人更歷事變不知稼穡之艱難往往驕溢爲父兄
者亦未如之何此無他術惟使多讀書觀古今盛衰
之故則知自謙矣知謙則知自守矣亦有讀書而愈
長其傲愈增其驕者則以其不知讀書之法視聖賢
之書不過爲干祿之具而不實體之身心不實驗之

人情世變竊其皮膚潤色爲文章謂可取富貴如拾
芥不自覺其傲且驕反不如不讀書之人猶知有所
畏懼此則又君子所深病而非讀書之咎也吳磊齋
先生有言子弟一讀書則百病皆除旨哉言乎由是
觀之謙也者守家之本也善讀書者又謙之本也
人生學問正當在失意磨鍊出來勿爲境累也
若平日能將小學字字熟讀深思則可爲聖爲賢亦
可保身保家汝等當互相砥礪人而不知小學其猶
正牆面而立也歟

聞令孫今歲已就試愚意不必汲汲與其勉強早入
 泮不如多讀幾年書使之學問充足下筆沛然不患
 功名不到手此一生受用不盡之道若一味欲速未
 培其根先求其華即得僥倖恐病痛非小某年來閱
 歷人情世態所見如此敢以質之高明
 所貴為儒者卓然自立而不染於流俗安分守己而
 不屈曲於人刻勵於中而不肯炫耀於外其遇與否
 聽之命焉

小學不止是教童子之書人生自少至老不可須臾

離故許魯齋終身敬之如神明近思錄乃朱子聚周
 程張四先生之要語為學者指南一部性理精華皆
 在於此時時玩味此二書人品學問自然不同

右陸清獻
公三魚
堂集

齒剛則亡舌柔則存爾其戒之巽以全身爾之不戒

終於必折盡言翹過前有覆轍

汪堯峯農
部座右箴

止水因風而起波明鏡遇物而含象可以喻吾心定
 靜安慮光景慮而能得莫先於誠意勿自欺是下手
 工夫慎獨是由心制意要領克治力而心無不正則

人欲盡去天理常存矣

顧用方
河帥語

理民之道務豐其財豐財之法必禁其奢

潔已奉公官守之常節存心愛物吏治之本原

事無鉅細皆當至誠處之積誠所感自足交孚乎上
下至於禍福利害有定數焉非人力所能旋轉願足
下置之度外但期隨事盡職上不負吾君下不負

吾民中不負所學而已

先儒之書錯出互見不可勝記若語類記錄尤爲身
心性命切要之言人生日用所不容斯須置者學者

審端用力之地無有過於斯者果能深求先儒所以
垂世立教之旨優游厭飫循循乎敬義夾持知行並
進由下學而上達則其所造有不可涯量者矣

學者立志當以聖賢自期本聖賢之學以消其固陋
發之爲經濟見之爲事業其於用也豈有窮乎

夫人工詞章以弋科名皓首窮經與身心毫無關涉
則書自書我自我也居官以氣質用事或泥古成法
不能揆度義理以適於宜卽不自肥其身家已與古
聖賢致君澤民之道異矣

言言巨金卷六
六
士君子一身欲爲千古擔當綱常維持名教苟非有
壁立千仞泰山巖巖氣象未有不與時浮沉委靡弗
振者

家庭之間恩多掩義不有言物行恒以豫爲之閑則
善念易壅私意易乘未有不流蕩而忘返者

家之有規猶國之有經也治國不可無經刑家不可
無規

所謂學者非外鑠而強爲之道不離乎人倫日用使
人人復其性分之所固有盡其職分之所當然苟其
有人倡之而不欣欣嚮化者未之有也

所爲道者在人倫日用之間體之以心踐之以身蘊
之爲德行發之爲事業非徒以爲工文辭取科第之
資已也

凡用世之道學者所宜深究昔范文正公做秀才時
便以天下爲己任看他氣象是何等宏毅今之學者
時藝之外茫然無知徼倖一第出宰民社凡兵刑錢
穀農桑水利民生日用之務可修可舉者毫無定見
不得不聽命於奸胥猾吏在我不能操其柄則居官

僅以守府耳今諸生未第時乘此餘閒卽當留心世
務淹貫博通務在有裨實用可以坐言起行則今日
草茅所論定卽異日之嘉謨碩畫也事孰有切於此
者

凡晏游交際不但有妨正業亦且漸長浮夸孔子所
以有佚游晏樂之戒孟子所以有一暴十寒之懼也
曷思大禹聖人尙惜寸陰吾輩中人當惜分陰倘日
務馳逐呼朋引類數往還勤問荅此不過騫名之徒
而已

經書爲義理之淵源其至當不易者固百慮同歸至
於隨人體驗隨時觸發意趣正自不窮所謂一番提
起一番新不妨各家門前各爲景致耳若拘文牽義
無所會心則味同嚼蠟矣程子所嘆飯從脊梁過者
是也

右張清恪公
正誼堂集

善人人可爲聖人人可至只一念悚惕便是人定勝
天

邇來毫無善行足述只事事反求諸已

右馬玉筍
銓部語

吏案如山風波似海總守定湯潛庵二語事繁而御

之以靜人詐而待之以誠覺荆棘化爲坦途寸心毫無罣礙

居官凡百任運極人世崎嶇傾險皆以守拙二字處之心地蕭閒不廢吟嘯

居高位不過多與夫數人門前鼓吹一部實則青鞵

布襪挹泉嚼蔬之樂遜隱士不知何等矣

右宋漫堂大冢宰西

陂類

持情必平處物必恕加恩於人所不知施德於衆所

不報

彭貽令語

人之生也受於天而有五性附於身而有五倫人於

五性或蔽於一則四者必皆有虧焉人於五倫能篤

於一則其他必皆不遠於禮

方伯川茂才語

一日之間自昧旦而起至寢息而止吾心發一念卽

自加審察爲理耶卽奮然直前爲欲耶卽毅然斷絕

公則能生明誠則能動物安則能慮靜可致遠

仕宦若浮海然危檣高艣蓬勃於風濤中泛泛然莫

知所屆休於家焉而後慶可知也

情之發也中節爲難而怒爲甚血氣蔽之克伐怨欲

之私乘之如川決防如火燎原其爲禍也烈矣
居官者清與惠兩相需也清而刻則無以惠民然非
清則不能惠

國家律令載在會典郡邑之事各有職志吾盡吾誠
焉虛心以訪之實力以行之天下無不可爲之政
君子之出處存乎學學存乎其志志存乎其識其識
高則志必遠志遠則學必深學既深然後綽然於出
處之間可以有爲矣

壽者生機之所積也生生而不已故壽也天道好生
故其行健而萬古不窮地道好生故厚德載物而永
貞無疆聖人好生故中心安仁而仁者必壽
士苟有志爲聖賢之學卽終身與窮相守求田問舍
汲汲於溫飽豈學者所屑爲此志定卽天下無不可
處之境矣

貧病早衰於讀書精神不無少損然古人恒於此驗
道力著書之興正當借窮愁爲策勵耳
位遇遭際時命爲主庸人皆能倖獲自君子觀之受
恩重則圖報愈難所處高則責備愈衆此可懼不可

喜也

余生平所寶二語處境則居易以俟命臨事則行法以俟命命之所在俟之而已職之所在不敢不勉今世所謂大惑者求富貴利達是也魯論謂富貴在天孔子得之不得曰有命孟子亦謂得之有命又曰行止非人所能也天也聖賢之言彰彰如是而世之極力以求富貴利達者殆不止十人而九是自謂其智出孔孟之上也天下無智出孔孟之上之人而羣然求出乎其上則豈非所謂大惑者歟余生平篤信

天命之有定從未嘗爲非分之求頗得身心暇逸以用力於孟子所謂求則得之者今年踰六十不敢謂盡能得之而亦不可謂一無所得若世人之所欲得者生平未嘗絲毫求之亦未嘗不偶得之至於內忝卿貳外歷封疆則世人所求而不能盡得者亦偶得之豈非命也哉嘗以身所閱歷爲親知反覆開陳欲因以解其惑而信者殊少或乃嗤爲拙予舊作原命一篇附覽倘能信鄙言而奉行焉則將來心逸日休蕩蕩之樂有過於富貴利達者

李巨來閣
學穆堂集

深文傷和姑息養奸戒之哉夫律例猶醫書本草也
其情事萬端如病者之經絡虛實也不善用藥者殺
人不善用律者亦如之

吾不知所謂四善也八法也官在識治體曉民情而
已

右徐雨峯
撫軍語

學貴有序無序雖務多無益也

見古人之行事立言而反求諸已其流於不肖者鮮

矣

右蔡武湖
廣文語

省言省笑省筆札省交游省妄想所不可一刻省者

居敬讀書耳

金伯
玉語

窮通有命讀書未必得功名不讀書則流入市儈矣
手目甚嚴力行未必到聖賢不力行則趨入禽犢矣

張宗
緒語

吉雲室日鈔卷六 終

吉雲室日鈔卷七

東吳貝省三輯錄

但能利民則寬嚴水火皆所以為仁而勞怨非所恤
 如不能因民則刑名教化皆足以為病而廉惠非所
 居蓋謬拘臆見博務虛名不以民事為事不以民心
 為心固未有能奏效者恐廉吏與貪吏罪相等好事
 較誤事害更大見小不成欲速不達莫之能出此者
 市恩者末後必招怨恩難繼也偏美者對面已成惡
 美無濟也

政有緩急難易人有強柔短長用違其材雖能者亦
難以自效雖賢者亦或致誤公用當其可卽中人亦
可以有爲卽小人亦每能濟事因材因地因事因時
必官無棄人斯政無廢事

疑似影像之懷人臣所深戒股肱心膂之義大吏所
當知

稍有瞻顧必不敢行稍有懈怠必不能行不敢與不
能之心必致負 君父而累官民

邊方大事惟賦與兵弼以刑名期於無壞凡諸瑣屑

皆所分寄若使各已就緒自應持其大綱示以鎮靜
以馭羣材今於尙無條理時尙不急加整飭破其因
循雖託言知體實無以濟用況督撫所謂小事至府
縣則爲大事府縣所謂小事至本家本人則爲莫大
之事稍有疏忽貽累匪淺

可信不可信原俱在人而能用不能用則實由己忠
厚老成而略無才具者可信而不可用聰明才智而
動出範圍者可用而不可信朝廷設官分職原以濟
事非爲衆人藏身地但能濟事俱屬可用雖小人亦

當惜之教之但不能濟事俱屬無用卽善人亦當移之置之

貪官之弊易除清官之弊難除實緣貪官壞事人皆怨恨樂於改正清官誤事人猶信重礙卽更張也振作料理雖須放膽原出自小心必謀終有成然後始事斯舉庶籌畫萬全可行久遠若稍涉孟浪惟計目前將興一利利未就而弊先伏除一弊弊未革而害更大

縱有精明之官能自作主而蠹胥奸巧窺官之意指乘官之懈怠援例揆情言之確鑿鮮有不爲所愚者總之事無巨細務宜親看查例查案原應分任或平或反斷須自主

大抵才智之弊莫大於邀功庸鄙之私莫甚於貪利懲斯二者則何念非公何事非實

隨習尙保名祿自以爲得計者豈獨不能爲國并不能自爲殊可怪歎亦殊可憐憫

命盜重案若謂少一核轉衙門事便草率焉知不多一核轉衙門事反拖延總之定罪之允當與否全在

督撫藩臬揆厥情理秉公推鞠則刑獄自無冤抑倘
大吏不能明察苟且了事不特添一核轉衙門終爲
無益卽委員調審亦不過虛應故事

大小文員內才守兼優者料難多得須先取其才幹
次論其操守我能駕馭卽有才幹而猾者亦可以
濟事我不能造就縱有操守而迂者其何能惠民凡
接見屬員稟商事件務虛心平氣令各盡所欲言庶
得周知情形以便裁處姦貪者必不可留粗直者切
不可棄雖辭氣溫和却不離嚴整先使人不可犯而

後次第條理庶官民相安而事易就緒再地方一切
設施必先計可成然後再舉大學云事有終始而不
言事有始終者蓋事必慮終而後謀始故凡所始事
必終有成彼論是非不論成敗之說猶是爲己私心
原未嘗關切民社耳又知道千乘之國首言敬事豈
有敬事之人尙有不信實之理此信字應作賞罰必
信信字看卽係果斷義蓋每有敬事之人惟恐錯悞
反致猶豫者故爲下一轉語人嘗言明決若臨事不
能決卽明處亦是假此雖是腐語然於政治却是本

論

既係匪類縱過嚴亦不為殘而統計或轉為惠

胥役作姦多半串通幕友而幕友弄弊定須句結家人操縱惟視本官把柄不在書吏如果本官勤明事親理寬嚴有制賞罰不撓即內戶洞開亦原無徑可入設使本官昏惰一應委代事理不知準駁聽便將無論下賤書吏固惟利是圖便伊親戚子弟俱或敗乃事而遂已私是即重門深鎖亦實有線可通

右鄂

文端公語

古人有言終身讓路不失尺寸老氏以讓為寶左氏曰讓德之本也每思天下事受得小氣則不至於受大氣吃得小虧則不至於吃大虧此生平得力之處凡事最不可想占便宜子曰放於利而行多怨便宜者天下人之所共爭也我一人據之則怨萃於我矣我失便宜則眾怨消矣故終身失便宜乃終身得便宜也

古之人必以其廉於取者言儉而今之人第以其吝於與者言儉則是使人好利之念而開天下以刻薄

寡恩之漸者莫儉若也

右鄭半人太守楊園集

學貴有本無本之學縱脩飾補苴無用於世有本之學其根沃者其葉茂本聖賢所以出治者發而見之事業是則莫大之經濟矣與師友講明而論著罔非載道之書是則莫大之文章也

讀書者貴在心得躬行不徒尙講明然講明所以寫其心得而啟天下以服習訓行

小學一書爲敦倫飭行之要脩身齊家之本士子少小先入以養正之言虛憍鄙陋之習悉去內聖外王

之學畢基於此

學問經濟必講求篤實堅確可見之施行博雜之學不足貴卽略見影響空言自大究竟何益

凡爲師者非徒教人以文也必使之篤倫理嚴義利馴致爲有用之儒

隨所讀之書身體心驗隨所行之事遷善改過開其學識使益宏裕養其德器使益堅定

親民之官以廉爲基以仁爲本引而近之欲其親格而禁之欲其嚴理之欲其明措之欲其簡慮民之不

給也爲之課農桑訓節儉徭役廣積蓄遇有故則
賑貸之又加詳焉慮民之不戢也爲之教孝弟敦睦
嫺懲誣黥息訟爭以事至者誨諭之又加詳焉根於
中而不徇乎外者賢守令也結歡上官而不體下情
者民之蠹也自恃無他而張弛不協者誠不足識不
充也視猶傳舍因爲利藪者本心旣失殃及其身者
也

士大夫得志在 朝則循分供職補過盡忠及退而
家居則以孝友廉潔經明行修飭諸弟子及鄉之後
進風俗人才類繇此長非徒林泉之樂也

士各有志惟所樹立不在官之崇卑遇之順逆要以
無愧衾影師友民物者出而茂著循聲樹偉績斯可
以稱人豪矣

親民之官其要有三曰息訟薄賦興教而已

養志以誠守己以廉待人以信講明踐履不染於俗
夫家者國之本也和者福之聚也雖有貴顯富厚之
家而其父兄弟之間稍有離心家之衰也曰可俟
也雖有貧窮困苦之家而其父兄弟之間常有和

言身錄卷一
氣家之隆也可預卜也

學問無窮收斂則愈廣大謹密則愈精明

治術關於學術經濟通於性命大臣以身任事必有公清之操有愷惻之懷有明通之識有強毅之槩有傲懼之心無公清之操則不免有寵利之疚矣無愷惻之懷則不能有納溝之恥矣無明通之識則膠執而鮮通矣無強毅之槩則雖知其然發之不勇守之不固矣無傲懼之心則自信太過禍且隨之矣
事上貴恭不貴屈馭民以誠不以術

徧察官箴洞悉民情明以周之斷以出之火耗則廉其重者究之奸猾則擇其尤者處之禁婦女之遊觀黜浮侈以從儉如是而吏民不悅服風俗不淳者未之有也

君子作事不令人諒而令人服不肯姑息苟且以徇一時之毀譽尤必使下情畢達無纖悉幾微之不周

右蔡文勤公
二希堂集

聖賢之學何爲者所以學爲人也爲人之道內之存心外之守身而已推之人欲其同歸於善考之古欲

其實獲於已而已今試思立本而非盡心本可得立乎守身而非循理身可得守乎致用而非已物兼成亦何貴此用者且讀書而不能反身實踐則讀書又奚爲豈學專主於記誦詞章供吾輩掇科第希富貴取悅當世而已乎

李重五語

紳士耳目也無耳目何以納益慕客心腹也無心腹何以論思佐吏股肱也無股肱何以集事然而用人難哉不先之以知人則招權聚賄官爲孤注矣不歸之於獨斷則坐嘯畫諾官同木偶矣有用人之識而

後可以用人有用人之才而後可以用人不然非用

人也用於人者也至於肘腋之間隱然爲奸莫如家僮莊以泄之慈以畜之尤當明以燭之嚴以防之易

曰機事不密則害成其御僕之謂歟

王犀川河帥吏治學古編

聽訟準之以人情物理出之以靜氣平心不事煅煉羅織而人心各得其平至於卹災捍患移風易俗當顛困欲斃之時而起之溝壑予以生全尤不若先事區處不致顛頓危急之爲妙也

陳容駟太守仕學一貫錄

生而爲人無益於世則不如無生仕而爲官無益於

言言日金卷七
九
民則不如不仕以其虛此官也虛此官則并虛此生
矣人謂百年富貴不過電影漚花抑知累世顯榮盡
是真常妙慧耶石成金
明府語
令行於光天化日之中而恩及於窮簷蔀屋之際清
著於茹蘖飲冰之節而愛篤於輟春弛瑟之餘
古之大臣必有千駟弗受萬鍾不易之操而後能以
匹夫匹婦莫不得所爲己任此聖門之學莫先於義
利之辨也

廉者臣道之根柢也周官六計弊羣吏統善能正法
辨而皆冠之以廉非廉則六者無出也

勵一介不取之節守四知自省之義飭吏治恤民情
苞苴旣除疾苦畢達兵戢於伍士養於庠農活於野

右彭南昀
侍講語

吉雲室日鈔卷七終

吉雲室日鈔卷八

東吳貝省三輯錄

凡百嗜好皆累心惟書足以明心養性而嗜者絕少
非惟聲色財利官爵珍玩奪之而舉業之奪彌甚昔
人以書治舉業今人治舉業而廢書余每為之太息

沈子大光祿
敬亭文稟

大冶鑄像有用必神莫神於目以鏡爾身為表為正
唯心是因故神昏氣衰視眊精亡變亂白黑豈無青
蠅明見萬里迺信其良胡炯炯以視而與心並盲馳

望逐逐不見座隅是謂太驚目驚者疏纖毫察察聞
彼遠模是謂太陋目陋者愚嗚呼一寸之睫萬象誘
之一顧一盼百行就之一見何害名爲之敗偶睹無
心身爲之沉尊其瞻視非禮勿觀胸中旣正眸子瞭
焉目官司視敢告在前

日箴

天地萬物羣聲之府畢入於耳靡有禁阻目可閉而
不視口可緘而不言唯耳闐闐我無其權故無響不
接有觸必先故王者有韃纊之塞君子有偏聽之戒
商徵變律雅鄭淆類譁囂叫詛俾爾心曠必達而聰

必治而聾聖人耳順聲入心通小子躑躑衰焉如充
胡勿爾駭而覲然爲容匪面命之言提其耳忠言雖
逆良藥爲比恐懼亦式云何不臧耳官司聽敢告在

旁耳箴

唯顏有鼻宅於中位可嘘晝夜爰通其氣匪爲私欲
以啟縱恣椒蘭薰蕕觸腦傷肺且吾聞穢德雖小聞
唯腥潔行雖隱聞唯馨馨香穢汗唯德之爭故有芳
必流在臭亦遺豈眇爾一身之肆而唯鼻是隨西施
雖美不潔見廢鄭衷蠱惑以劓所愛故曰善不可喪

謀不可悖大聖主敬屏似不息爾何惰慢而心爲形
彼形既外縱心迺內損性也有命理義所謹鼻官司
氣敢告權準鼻箴

身之興喪唯口所係盍守其防以遠爾害出之曰言
入之曰味厥味如之何醜毒所生肥醲甘脆命曰腐
腸羊羹亡國牛飲喪邦厥言如之何愆尤所覃如簧
如流興戎召讒白圭何復金人何緘故山上雷下象
頤於易君子以慎言語節飲食非口是責而繫誰之
責夫齒爲舌垣唇爲齒藩唇齒噬嗑禍福之門福因

迪召禍由逆結迪逆匪遠視口出納一茹一吐胡能
不有關口官司慎敢告喉舌口箴

人有四肢運之則靈如彼一國三公六卿心君爲政
百體奉行躬迺大治權不外傾孰不欲佚佚則淫生
胡爲勿勤勤則善興昔者大禹胼胝後世頌聖陶侃
運甓寸陰是競勞其筋骨動心忍性勿曰吾勇任意
妄動勿曰吾慎見義不進勿曰細娛舜蹠一趨勿曰
暗室鬼神伺側嗚呼人生實難支體具存幸無微虺
利於屈信胡勿師彼賢聖而委於鄉人形官司敬敢

告爾身

手足
箴

持業以就正可也銜耀所長以冀人之稱譽則不如
藏拙蓋其長者未必長也集眾以廣益可也傳會相
知以邀人之色笑則不如寡交蓋其知者未必知也
堯舜孔顏未嘗無苦有道以善其苦而於是乎樂人
有此生卽與苦爲表裏爲終始人羨富貴之樂而不
知其必有倍於貧賤之苦者

右黃石牧太
史唐堂集

事不越於日用倫常理惟主於忠信篤敬實爲立身
行己之極則

講學以誠正爲本論事以忠孝爲先

密於自修恕於責人

人苟事事從倫理上著想則生平必無悖理傷道之
舉

讀書以窮理爲本講學以力行爲先

存心則平恕周匝立論則和易近人

在己畏其難偏欲以難責人不恕故也不恕由於不
公

耐瑣屑習煩苦不輕喜不易怒不激不隨皆忍字之

臺學自金卷八
四
妙故居官以此爲尙

講風俗能就自己身上講起便有許多不肯苟且之意

治獄不苟皆一點不忍之心非僅懼禍而已

聽人之言略其所短取其所長旣不失己亦不失人推之卽大舜之隱惡揚善也

居官不可存徼福望報之心又當知有出爾反爾之事

法不可玩心主於慈

視俗以施教察失而立防當今政教之極則也

情僞百出何所不有凡事一有成見自然不得其平趨利而利未必得避害而害未必免凡事往往如此爲天下不爲一身計久遠不計目前可爲居官者法以公心謂仁仁字纔有分曉以盡職守分謂義義字乃見著實

行事必要人人道好亦是私心況人之願欲不齊識見各別事關重大豈能盡如人意

爲政者看得律是防範人欲扶翼天理則可以用律

矣

禮教始於紳士振興全在官司

官司行政有惟恐不能及民之心乃可謂親民之官
教興養成莫不由此

以精明體察民情則不傷於苛刻適足廣其化理

時時體察下情事事不失恩信

人無終身不去官之理只要論爲何事失官或公或
私不可不辨

地位高一層則責任更重一層非虛擁其名而已也

惟恕而後能公不易之理人自不察耳

凡不可與士民道者皆居官所不可爲也

清而不理民事清而不合人情清而不防流弊皆糝
政也

地有土產自是民生之利今不以爲利而以爲害皆
司土者漫無體恤之故

今人祇以科第爲難卻不知科第後其事更重其名
更難副也

凡施恩不終甚至恩反成仇皆由不曾覷破施恩是

自己應做的事也

已不自信焉能信人欺人還以自欺耳

不論數而論理君子居易俟命正是此意

遇道義之事當以錢財爲輕至於衣食自奉又當念錢財之難方不妄費方能惜福

聰明而不學厚何所不爲一味以容過爲厚道亦非也

夫刑所以弼教非竟以刑爲教也司土者平時未嘗教之而遽以刑之父母斯民之義其謂之何

凡居官者每每計較地方苦樂以爲憂喜若惟恐地方之有累於己而不慮己之有負於地方

人能嚴義利之辨觀物我之源則心地日就光明規模日就宏遠矣

居官者每日之內一舉一動非功卽過見過易見功

亦易返觀內省蓋無刻不在功過之中可不懼而知

所勉乎

右陳文恭公語

心非靜不能明性非靜不能養靜之爲功大矣哉鐙動則不能照物水動則不能鑑物靜則萬物畢見矣

惟心亦然動則萬物皆昏靜則萬理皆徹

心無累能靜勤省察以驅閒念能靜不疾行大聲能

靜不見可欲能靜

右唐翼修廣文讀書譜

為縣官有三事曰儉簡檢而已儉者薄於自奉量入為出所謂以約失之者鮮此不虧空不婪贓之本也簡者合繁則民難遵體亢則下難近一切反之無苛碎無拘執無聽陋例無信俗諱儀從可減減之案牘可省省之檢者天有理人有情吏部有處分上司有考課豪強將吾伺奸吏將吾欺入一錢乙諸簡得無

納賄施一杖榜諸冊得無濫刑耶今日去官吾倉庫不畏後任明日還鄉吾心跡可白友朋此又所謂檢

也

牛階平明府空山集

人生不必激流為池累石為山蒔花藝竹擁卷其中乃足樂也有司一方時歷鄉落青山淥水豐草長林到處有之儘堪領取若曠野無人把書一卷高踞肩輿中琅然作雜誦斯時自顧亦差不俗何必以俗吏為嫌哉

袁易齋儀部語

儀部語

以明勗吏以仁育眾奸蠹罔不燭廢墜靡不舉禮賢

愛士廣建義學甄陶造就無所不至

論治者以用賢才為最急用之之道必使之各展所

長而後可收實效

右王次山侍御良齋集

世之論仕者有二失焉其一以為功名可力取也於是通苞苴事造請以求之其一以為功名不可以力取也於是玩時愒日而百事廢焉不知不可求者官也不可不求者官之事也一階級有定數而可妄冀乎一斛粟皆君恩而可素餐乎

程雲軒太常語

天下辦事人多解事人少深刻非明懈弛非寬交際

非私協恭非黨

史文靖公語

省無益之應酬窮有用之經史與儒先之書日相親則道心生苟庸碌之儔日相接則欲念熾逐長夜之飲則昏知而爍神飾耳目之觀則耗財而奪志人有關說之事勿開其端宜峻絕之人有緩急之請苟力可及當曲從之詞章之學祇求文理無疵刻意求工則害道進取之途須知得失有命稍事馳騫則喪品悠悠忽忽便虛度一日便虛度一年便虛度一世戰兢兢始不負所事始不負所生始不負所學

王文山學

正家訓

吉雲室日鈔卷八

九

吉雲室日鈔卷八終

吉雲室日鈔卷九

東吳貝省三輯錄

盡天下之人別其業而命之士農工賈四者而已而士獨以儒稱重之也亦責之也

學術邪正之分途名與實而已無所為而為者為君子有所為而為者小人也學者誠能體察於身心之間存理遏欲進進不已則聖人可學而至何有於名儒乎

天生聖賢以為天下未有功名不本於道德亦未有

吉雲室日鈔卷九

一

道德而不發爲功名者不幸而著書育才以守先待後非得已也

吏者涖也爲天子涖此民也自牧伯監尹下逮一州一邑之長統謂之吏吏得其人則民安民安而天下治矣顧必如何而後爲得人曰廉曰才曰慈惠曰強幹四者盡之矣

宋張觀自謂守官以來惟持勤謹和緩四字又云世間何事不從忙後錯過蓋爲其事而輒計其效則進銳者退必速卽幸而有成而急遽苟且終遺後日之悔彼惴惴無華之吏循守繩墨而程能效功日計不足月計有餘况煦育涵濡以養以教事不煩而民享和平之福此王道之所以悠而久也

庸庸者自托於簡易鎮靜以文其迂拙固卑卑不足道其或慕古人之雅化而優遊無爲卽使子賤鳴琴而理而怨咨愁苦之聲不息雖日奏南風之曲能使阜財解愠乎有恒產而後有恒心假而終歲不飽而欲使家莖戶誦吾知子游有所不能也

右朱文
端公語

公餘當多讀書古人治譜具見載籍誠能規效而變

通之自異俗吏所爲矣

士君子讀書養氣當於聖賢得力處體認真切則脩身立朝方有把握不爲寵辱利害所移至勲名事業殆有天數小用大用皆貴有以自見若容容富貴中心無所主倘境遇紛乘必將潰裂不學無術之害非同淺鮮

右金檜門

總憲語

爲政在誠心愛民興利除害化導之而已嚴峻非邑

之福也

佟信侯
刺史語

人心厚則言不佻人心畏敬則言不肆能養其性情

之正則言日和平而進於道非貌托古人以取譽於

世夫亦求其所以自得而已

胡牧亭
侍御語

士大夫必有毅然任事之心而後可集事必無所牽就附合而後能毅然任事又必一塵不染一念不私而後能無所牽就附合至於仕宦升沉則有數焉君子弗論也

劉文正
公語

事 君如事天天地無心而成化雨露雷霆無非教也人能常脩省於受恩之時則雷霆乍來轉不惑亂而至誠所格天心亦回

方敏恪
公語

躬行實踐為本愛人利物為施

百里寄命萬夫所望事上接下誠敬是將勤爾職業
飭爾紀綱勿務趨走勿事恢張內省幽獨外徹忘荒
劍鋒匣斂玉彩匱藏鑑物無私犀照毫芒守土之責
在時雨暘神明凜若視爾否臧學孔之禱體文之傷
蒲鞭薄罰斗斛平量甘棠永愛民用悅康慰我衰老
箴訓無忘縣齋座右
銘示子
家用平均惠於鄉里稱心而施視人如己

性情正而後學術明學術明而後事業著處為醇儒

出為名臣無異道也

善為治者當為民圖其可久以節儉示民斯可久之

道也

右彭芝庭大
司馬文稟

三復白圭防言之玷文亦匿瑕慎哉自檢

圭硯
銘

治人之道忌察淵魚治己之道則污垢必除言各有

當君子念諸

刷
銘

金百鍊而精人百鍊而成見道者明守道者貞

立身行道不愧古人經世通方具有實用

無經世之才仕宦而遇合命也其不遇合則分也有

開濟之畧仕宦而遇合分也其不遇合則命也各知其分各知其命窮達一順其自然均賢者之用心也

右紀文
達公集

人惟能受善言能知人善任使雖無才亦可免過矜智恃才以自用者乃世間至愚人小伎倆適以自害而已

爲政最不可喜事見能必至生事滋擾而奉行不善者非藉以取巧卽因緣爲奸然又不可以此而自怠苟安也事到面前無大小皆當細心體察分所得爲

者審時度勢隨事救正於民生不無小補也

右陳紹洙進士

疑齋集

入則孝出則弟無損人以益己無樂禍而幸災磊落瀟灑率真本色必信必誠不必講道學乃是真道學也

心地光明則智慧日生見識日遠

讀書涵養之下當時時存仁愛之心在在思絜矩之道

行實政者必以實心而實心之要在於無欲無欲則

不自欺無欲則明明則洞晰人情通達時變而政所以成

養生民之元氣樹 國家之根本以道事 君以誠立政

夫民安其生則樂輕其生則怨

竭忠盡孝謂之人治國經邦謂之學安危定變謂之才經天緯地謂之文海涵地負謂之量嶽峙淵渟謂之器光風霽月謂之度先覺四照謂之識萬物一體謂之仁急難赴義謂之勇遺榮遠利謂之廉鏡空水

止謂之靜槁木死灰謂之定美意良法謂之功媿聖
追賢謂之名安於習俗謂之無志溺於富貴謂之無
恥

讀經傳則根柢厚看史鑑則議論偉觀雲物則眼界
寬去嗜慾則胸懷淨山林之身卽廊廟之器心志要
苦意趣要樂氣量要宏言動要謹窮達聽之於天擔
荷操之於己

右蔣心餘太
史忠雅堂集

吉雲室日鈔卷九終

吉雲室日鈔卷十

東吳貝省三輯錄

父母存雖不肖之子有所畏懼而不敢恣父母歿遂
 泰然自以為無忝而不知日近於無恥無曰吾忠毫
 髮之蒙責有邱山之重無曰吾孝跬步之躁業墜箕
 裘之紹勤於生事雖手足之力已殫尙當念前人締
 構之艱儉於自奉雖口腹之養已嗇不可忘先世澹
 泊之積讀聖賢書不讀雜書醫卜星命之類方為能讀父書
 行仁義事不行邪事左道巫祝之類是謂克行父事一念之

善顯揚之券一念之惡毀敗之橐人莫鑒於水而鑒於人彼忘親而賤行辱身者曷嘗不為笑於鄉隣

思貽

銘堂

上不阿中不隨

音馱

下不苛持是三者以遊乎世其庶

免於君子之訶

仕箴

一字之奇不足侈也千言之富未為厚也君子盛德

在躬行必稽其所敝言必慮其所終也

硯銘

其質塊然其德淵然其處寂然其施爛然

硯銘

烏乎進德在淵默烏乎修業在典籍戒之哉多言多

敗無行所悔

硯銘

士首四民其品最貴今日為鄉閭師表異日即可為

王國羽儀故凡遠到之器必深沉厚重而不肯驟

露其才譬如花木或數年而吐萼或歷秋而始馨則

人愈珍之若夕種而朝已榮朝榮而夕即萎又曷足

貴乎

心地光明者必有昌明博大之文操行不苟者必有

清微淡遠之旨

爾多士讀書攷古曾見有為士不醇而學術事功可

師可法傳述於後世者乎

愿朴守分敦品積學之人則親之近之好持短長狂妄刁健之徒則疏之遠之

親民之官守重廉潔而廉潔必本於節儉

夫令一州一縣之山川險易民風土俗如指掌紋者有司之責也一道之官吏賢否民情向背如燭照數計絲毫不得遁隱者監司之責也

惻惻無華慈良爲政

民命至重仁者所宜盡心春秋據事直書其義自見而昔時文吏往往傳會經傳澤以采藻斯何事也乃爭文詞之工拙哉

國家懸爵祿以待天下士如皆足以榮其身而去安賴有若人哉古之去者或以其時之未可否則以其道之難合否則以其身之就衰非此數者而以去爲

名吾未見其得也

右陸朗夫撫軍切問齋集

保家之道曰儉曰勤保身之道曰謙曰慎

己有一善人必知之有一不善人亦必知之欲人不知除非莫爲今人日作不善而懼尊長之聞輒疑某

人謗我某人離間我此人終無改悔之望矣古語云
止謗莫如自修盍三復斯言

與朋友交必求直諒多聞者直諒不易得得多聞之
人亦可以增長見聞擴充學識矣否則羣居終日言
不及義博奕飲酒無所不爲多一友卽多一累

右錢竹汀

少詹語

近世學業之弊在浮文日勝不知反本卑者溺帖括
靡曼旣不足與言其靡知從事於六經者顧徃徃不
求實得於己而徒欲求取於人求勝於人夸多鬪靡

黨同伐異雖白首鉛槧著書滿家難免玩物喪志之
誦大可惜也

聖人之道如太虛然仁者見仁智者見智門庭施設
代翁代張譬如四時之錯行如日月之代明自善學
者觀之要皆太虛之妙用耳

讀書講明義理祇貴求其放心

夫名非君子所務也實固不可以不急也忠信以進
德修辭以居業所以盡乎其實也

右彭尺木進士二林居集

盡心 人須實做 人從本上做起 做人先立志

須耐困境 常存退一步想 時日不可虛度

作事要認真 作事要有恒 事必期於有成 要

顧廉恥 貴慎小節 當愛名 勿好勝 財色兩

關尤當著力 因果之說不可廢 不可責報於目

前 名過實者造物所忌 不可妄與命爭 少年

富貴須自愛 處豐難於處約 欲不可縱 貧賤

當勵氣節 擇穩處立腳 居官當凜法紀 宦歸

尤當避嫌 守身己律

統於所尊則整齊 孝以順為先 惟孝裕後 事

鰥父寡母更宜曲體 友難於孝 冢子宜肩重任

弟當敬兄長 佳子弟多由母賢 教子弟須權

其材質 子弟勿使有私財 謹財用出入 財貴

能用 勿貪不義之利 勿爭虛體面 儉與吝嗇

不同 非儉不能惜福 服用戒過奢 儉非勤不

可 有子勿輕置妾 無子可繼宜依禮耐食 不

可求為人後 祭先宜敬 祭產宜豫 值祭不宜

論產 勿掩葬 婚嫁宜量力 相子擇婦 攀高

親無益 締姻宜取厚德之家 奴婢宜督約 奴

婢疾病宜善遣 保全節操 酒最債事 戲具斷
 不宜蓄 架上不可有淫書 田宅交易須分明
 便宜產業不宜受 契稅不可漏 勿欠額賦 官
 項不宜借 勿受來歷不明之物 勿貪重息出貸
 勿因輕息舉債 債宜速償 子孫多產宜分析
 析產宜酌留公項 有室有家之男女宜為曲諒
 勿營多藏 宜量力贍族 宜儲書籍 造宅不
 宜過麗治家
 勿欺 處事宜小心 大節不可遷就 勿圖占便

宜 勿任性 遇橫逆尤當忍耐 讓人有益處
 斷不可啟訟 勿鬪爭 言語宜慎 小人不可忤
 嫉惡不宜太甚 善惡不可不分 勿苛人所短
 勿過剛 遇事宜排解 勿預人訟事 勿輕作
 居間 勢力不可恃 信不可失 勿傍人門戶
 勿貪受贈遺 貧賤勿取厭親友 富貴勿薄視嫻
 隣 須予人可近 失意人當禮遇 保全善類
 敬官長 勿交結官長 睦隣有道 受恩不可不
 報 索債無太急 貸親不如貸友 宜量友力

諱貧偽貧皆不必 受憐受忌皆不可 與人共事

不可不慎 勿破人機關 知受侮方能成人 老

成人不可忽 先友宜敬事 故人子宜念 不必

議論二氏 世應

裕後有本 濟美不易 教當始於孩提 宜令知

物力艱難 宜令習勞 宜令知用財之道 宜令

勿游手好閒 宜杜奢華之漸 父嚴不如母嚴

蒙師宜擇 讀書以有用為貴 讀書求於己有益

須學為端人 作文士不可有名士氣 文字勿

涉刺誹 勿作穢褻詞 文章關福澤 讀古人文

取法宜慎 勿輕為人作詩文序 勿紀錄時事

浮薄子弟不可交 勿輕換帖稱兄弟 擇友有道

業儒亦治生之術 讀書勝於謀利 勿慕讀書

虛名 勿任子弟匿瑕作偽 不宜輕令子弟附學

授徒勿誤人子弟 力田勿欠人租息 藝事無

不可習 幕道不可輕學 習醫宜慎 勿妄言相

墓術 作事須專 臨財須清白 勿自是 勿自

矜 當明知止知足之義 言動當念先人 門閥

不可恃 幹蠱大難 須作子孫榜樣 不可道他人
先世短處 為後人留餘地 窮達皆以操行為
上 得志當思種德 人當於世有用 惡與過不
同 清議不可犯 宜知盈虛消長之理 聽言不
可不察 宜常念忠恕之道 聖賢實可學而至
人在自為 不孝者不祥 善惡不在大 蕃後 右
汪龍莊明

府庸
訓目

事君忠事親孝以立綱常友兄弟和妯娌以敦一本
睦親族輯鄰里以息訟端濟貧困矜孤寡以養忠厚

不勤儉而能呆家者此非天理不謙和而能處世者
豈是人情心地壞必至敗亡福田廣自有果報奮志
功名以顯父母口腹之養不為孝廣儲經史以教子
孫姑息之愛不為慈好佚游而忘勤學是名教之罪
人娛耳目而蕩家財非吾門之肖子爾曹能凜此數
言庶幾知有以勸勉而世世守之勿替云

處世以謙和為貴無傲慢待人以寬厚為先勿刻薄
用事居家豐儉得宜每事弟兄協和酌處諸子孫務
令讀書明道勿以居官為榮或幸登仕版勿以資財

爲重

右先高祖農部公家訓

孝弟忠信根本也富貴功名枝葉也今不養其根本而妄希枝葉之茂其可得乎故讀書以躬行實踐爲先不僅文章華國而已也

予自春明言旋閉戶謝客塵緣掃盡惟以詩酒自娛暇則與二三同志避喧澹園攬烟霞之出沒睹泉石之清幽講性命之學論古今之文怡怡如也

右先曾祖虞部

公聽濤書屋文彙

付還小學及陽明先生集皆已收入未識吾弟一一

細讀否邇時謀生不易趨向宜正願吾弟杜門養靜立志讀書簡酬應遠損友奉母教子之餘節儉持身爲要讀有用之書省無益之費先將經史研究其旨繼將程朱語錄及先正性理諸書有關身心學問者時時展玩自然義精仁熟奢靡之性日漸忘矣夫進一分義理卽少一分人欲久之自有實效況吾弟年富力強積學待時卽或升沉有數亦當安於義命如我朝湯文正位居鄉貳手不釋卷日夜孜孜撫吳時衣無重裘食不兼味吳中風俗爲之移易左氏曰

儉德之共也侈惡之大也願吾弟三復此言茲敬錄
先大父家訓中節儉讀書二則望懸之座右以冀朝
夕省覽無忘先人之訓無墮先人之業以繼詩書之
緒萬勿自暴棄也願吾弟勉之


先祖儒林公
容齋偶存彙

吉雲室日鈔卷十 終

吾吳貝氏世有淳德爲鄉里望見香仁弟恪守彙訓
以義方教子令嗣吉雲叅軍少有大志卽不屑爲帖
括之學嘗欲斬至於古之立言者曾遊於宣南吳巢
松侍讀素愛其才留之幕中因得遍交當世賢豪學
益醇識益廣歸而閉門博極羣書凡 國朝先正所
言有足以模範心性與夫修齊之所資及在位可裨
政事者皆筆之奚囊積而成書譬土壤悉會泰山涓
流同歸大海零玉散璧皆託質藍田異卉奇葩皆連
根上苑洵檢身之寶鏡淑世之智囊也頃將登梨棗

示橐於余余既喜吉雲之能鞭迫近裏務為實學而
又幸見香有繼述之令子也爰書數語於後

道光丁亥冬十一月上浣節安汪廷楷



天降

